



CH-7144 Vella, 05/02/2021

## **Elecziun complementara commember dalla suprastanza communal Lumnezia**

Demissiunescha ina persuna d'in uffeci el decuors dalla perioda d'uffeci per motiv da sanadad, midada da domicil ni per in auter motiv objectiv, eis ei da far in'elecziun complementara pil temps d'uffeci restont, sche la perioda d'uffeci currenta cuoza aunc dapli che nov meins. Per l'elecziun complementara valan las medemas prescripziuns sco per las elecziuns ordinarias.

Tier elecziuns complementaras ella suprastanza communal han candidats respectivamein proponi da vischinadis ch'ei aunc buca ni buca pli representai en suprastanza la preferenza en relaziun tier las vuschs obtenidas.

La vischnaunca Lumnezia enquera novs candidads per l'elecziun dad in commember ni ina commembra dalla suprastanza communal dalla vischnaunca Lumnezia per la perioda d'uffeci 2021-2024.

Tenor art. 13 dalla Constituziun dalla vischnaunca Lumnezia san candidaturas ni propostas d'elecziun per ina autoritad communal vegnir inoltradas da mintga persuna cun dretg da votar en scret alla canzlia communal. Quellas han da cuntener il num exact dalla candidata ni dil candidat e sin tgei uffeci che la candidatura ni la proposta d'elecziun sereferescha.

Mintga persuna cun dretg da votar sa inoltrar mo ina ga ina proposta d'elecziun. Ina proposta d'elecziun astga cuntener sil pli bia tons nums da personas elegiblas, sco quei ch'ei ha uffecis vacants. Nums che survargan il diember maximal vegnan strihai dalla gliesta da sut ensi e da dretg a seniester.

Per ch'ina proposta d'elecziun seigi valeivla, sto quella esser suttascreta dalla persuna che fa la proposta e dalla persuna che vegn proponida.

La vischnaunca publichescha candidaturas e propostas d'elecziun ch'ei valeivlas dafertontier sin sia pagina d'internet per informaziun. Sil pli tard 14 dis avon las elecziuns vegnan las candidaturas e las propostas d'elecziun publicadas els organs da publicaziun dalla vischnaunca. Candidaturas e propostas d'elecziun che vegnan inoltradas memia tard, vegnan buca publicadas.

Ina candidatura sa vegnir retratga tochen il termin dalla publicaziun ufficiala. Cul consentiment en scret dalla persuna proponida sa ina proposta d'elecziun medemamein vegnir retratga tochen quei termin.

Annunzias da candidats ein d'inoltrar entochen ils **28 da fevrer 2021** en scret: Administraziun communal, Caum postal 54, 7144 Vella. L'elecziun ha liug ensemen cun la votaziun cantunala dils 13 da zercladur 2021

### **Uffeci vacant ella cumissiun da baghegiar**

Entochen la fin digl onn 2020 eis ei buca reussiu d'anflar candidatas e candidats per igl uffeci vacant ella cumissiun da baghegiar. Ei mauncan dus commembers per la perioda d'uffeci 2021-2024. Persunas interessadas vegnan supplicadas d'inoltrar lur candidatura entochen ils **15 da fevrer 2021** all'administraziun communal Lumnezia. L'elecziun succeda tenor art. 64 dalla constituziun communal a caschun dalla proxima radunonza communal.

Suprastonza communal Lumnezia